



Broj: 14-02-49-03563/17

Datum, 17.08.2017. godine.

**Bosna i Hercegovina  
Federacija Bosne i Hercegovine  
SKUPŠTINA KANTONA SARAJEVO  
S A R A J E V O  
n/r, predsjedateljice, Prof. Ane Babić**

**Predmet: Odgovor na zastupničko pitanje broj: 01-05-21788/17 od 10.07.2017.god.  
postavljeno od strane zastupnice Selme Filipović - dostavlja se**

Kantonalna uprava za inspekcijske poslove Kantona Sarajevo, dana 28.07.2017. god. zaprimila je akt Stručne službe Vlade Kantona Sarajevo, kojim se na dalje postupanje dostavlja zastupničko pitanje postavljeno od strane zastupnice Selme Filipović na 31. Radnoj sjednici Skupštine Kantona Sarajevo, održanoj 05.07.2017. godine u okviru tačke dnevnog reda "Poslanička pitanja, incijative i odgovori" koje glasi :

"Imajući u vidu činjenicu da ne postoji nikakva zakonska regulativa koja reguliše korištenje nargila, čija upotreba je enormno zastupljena u ugostiteljskim objektima u Kantonu Sarajevo, u skladu sa kojom bi nadležni inspektorji mogli izdati rješenje za otklanjanje nedostataka u ugostiteljskim objektima ili izricati bilo kakve sankcije, a potpuno svjesni dokaznih štetnih efekata korištenja nargile po zdravlje mladih i adoloscenata, s obzirom da se radi o osobama koje su u razvojnem dobu, čijom dugotrajnom upotrebom može doći do pojave hroničnog bronhitisa, ili ponavljane upale pluća i na kraju do neminovnog gubitka imuniteta, molim Vladu KS da mi odgovori koje je mjeru i radnje poduzima s ciljem pravnog regulisanja oblasti primjene nargile (starosna dob osoba koje je mogu konzumirati, normiran sadržaj nargile, sankcije za one koji prekrše takve propise)."

U vezi s postavljenim pitanjem, dajemo slijedeći

**O D G O V O R :**

Kantonalna uprava za inspekcijske poslove Kantona Sarajevo je na zastupničko pitanje sličnog sadržaja odgovarala dva puta i to: na zastupničko pitanje broj: 01-05-17019/15 od 18.06.2015. god. i zastupničku inicijativu broj: 01-05-8918/16 od 04.04.2016. god.



Kantonalna uprava za inspekcijske poslove ne raspolaže podatkom o tačnom broju objekata koji pružaju uslugu konzumiranja nargila jer se objekti u kojima se nargila konzumira najčešće vode kao ugostiteljske radnje, bosanske kafane i sl.

Broj ugostiteljskih objekata u kojima se konzumira nargila se mijenja i isti je u trendu porasta što se može svakodnevno konstatovati.

Kantonalna uprava za inspekcijske poslove, u saradnji sa policijskim tijelima, Zavodom za medicinu rada i Zavodom za javno zdravstvo, namjeravala je pribaviti nalaz i stručno mišljenje o sastavu smjese za nargilu u cilju otkrivanja eventualnih primjesa narkotika (zbog očigledne ovisnosti mladih ljudi i potrebe za sve češćom upotrebom), ali nakon ostvarenih kontakata sa desetine laboratorijskih došlo se do saznanja da se u Bosni i Hercegovini ne može uraditi takva analiza, te bi uzorke u cilju ispitivanja trebalo slati u inostranstvo što podrazumjeva komplikovanu proceduru. Granična kontrola pri uvozu smjesa za nargilu je po mišljenju sanitarne inspekcije nepotpuna i sastoji se samo od organoleptičkog pregleda, na osnovu čega se izdaje odobrenje za promet.

Problem konzumiranja nargile i njenog štetnog uticaja prepoznat je i zdravstvu. U zdravstvenim ustanovama i zavodima za javno zdravstveno postoje studije o štetnosti konzumiranja nargile kao i nalazi o izvršenim mikrobiološkim ispitivanjima, koje zakonodavac može iskoristiti kao argumenat kod donošenja propisa.

Sanitarni inspektorji Kantonalne uprave za inspekcijske poslove Kantona Sarajevo su u postupku inspekcijskih pregleda objekata koji pružaju usluge konzumiranja duhanskih prerađevina, kao i smjesa bez sadržaja duhana-nargile utvrdili da:

1. U zakonskoj legislativi ne postoje propisi u vezi sa posebnim uvjetima koje je potrebno osigurati za ovu vrstu djelatnosti.
2. Subjekti nadzora obavljaju ugostiteljsku djelatnost tipa "cafe bar" i "bosanska kafana" u skladu sa izdatim općinskim rješenjem, a u opisu odobrenog predmeta poslovanja u nekim objektima ima čak naglašeno konzumiranje nargile.
3. U većini kontrolisanih objekata je utvrđeno da uposlenici nemaju znanje o održavanju higijene nargile kroz koju prolazi spoj ljepljive melase, vodene pare i zraka iz respiratornog trakta korisnika, te mogućoj štetnosti uslijed korištenja.

Uposlenici i vlasnici imaju različite tvrdnje u pogledu održavanja higijene. Neki kažu da se gumeni nastavak ne smije prati jer je unutra žica koja korodira, drugi pak povremeno peru deterdžentom i topлом vodom nakon čega rade dezinfekciju, a ima i onih koji tvrde da zrakom iz aparata za kafu "propušu" crijevo, dok pojedinci povremeno sva gumenia crijeva nose vulkanizeru na propuhivanje. Međutim, konstatovano je da svaki konzument nargile dobije upakovani jednokratni nastavak za usta.

4. U nekim od kontrolisanih objekata nije bilo obavijesti o zabrani korištenja nargile osobama mlađim od 18 godina što je iznuđeno od inspekcije, iako niti jednim zakonom nije određeno.



5. U inspekcijskim nadzorima je konstatovano da deklaracija na masi za nargilu nije potpuna (nema prevoda i upozorenja na službenom jeziku naroda Bosne i Hercegovine, nema podataka o uvozu), napominjemo da se na granici prilikom uvoza smjese za nargilu treba provoditi pojačana službena kontrola koja uključuje pregled dokumentacije, identifikacijski i fizički pregled, odnosno laboratorijske analize, primjenjujući jasno definisan program sljedivosti za puštanje pošiljki u slobodan promet.

Na osnovu utvrđenog činjeničnog stanja u objektima u kojima nisu ispoštovane higijensko-sanitarne mjere, inspektor su poduzimali zakonom predviđene sankcije, odnosno pokrenuli prekršajni postupak izdavanjem prekršajnog naloga.

Iz navedenog razloga Inspektorat sanitarne, zdravstvene i farmaceutske inspekcije i inspekcije za hranu je prilikom dostavljanja izvještaja o radu Ministarstvu zdravstva Kantona Sarajevo više puta isticao i pokretao inicijativu za donošenje zakonske regulative, koja će tretirati ovu problematiku.

Također želimo istaći da su inspektori Inspektorata tržišno-turističke inspekcije Kantonalne uprave za inspekcijske poslove u periodu od 09.05.2016. godine do 12.05.2016. godine izvršili 25 inspekcijskih nadzora nad radom ugostiteljskih objekata koji uslužuju gostima nargile, na području Općine Novo Sarajevo i Općine Stari Grad Sarajevo.

Tom prilikom su utvrdili i zapisnički konstatovali da rješenja za rad kojim se dozvoljava obavljanje ugostiteljske djelatnosti ugostiteljima, ne sadrže i uslugu pripremanja smjese za nargile i usluživanje nargilama gostiju u tim ugostiteljskim objektima.

Naime, usluživanje nargile nije pozitivnim propisima određeno kao ugostiteljska djelatnost i ne nalazi se kao takva u pravilnicima za ugostiteljsku djelatnost. Zakon o ugostiteljskoj djelatnosti ("Službene novine Federacije BiH" broj 32/09) ni u jednom članu ne tretira proširenje predmeta poslovanja, te isti nije ni sankcionisan u pomenutom Zakonu.

Inspektori su po utvrđivanju činjeničnog stanja subjekti nadzora izdavali rješenja o otklanjanju utvrđenih nedostataka u smislu nepostojanja odobrenja za usluživanja nargila gostima u predmetu poslovanja u rješenjima za rad ugostiteljskih objekata koji su bili predmet inspekcijskog nadzora.

Na izdata rješenja, većina subjekata nadzora je uložila žalbu koja je od strane Ministarstva privrede Kantona Sarajevo, kao drugostepenog organa odbijena. U jednom slučaju je pokrenut upravni spor, koji je još u toku.

Ovdje želimo naglasiti i nejednako postupanja opština po navedenom pitanju. Naime, Opština Stari Grad je na zahtjev subjekata nadzora u rješenjima za obavljanje djelatnosti (obrtnici) odobrila i konzumiranje "vodene lule" – nargile, dok je Opština Novo Sarajevo navedeno odbila učiniti.

Nejednako postupanje opštinskih organa je upravo rezultat nepostojanja zakonske regulative koja bi uredila ovu oblast. Želimo istaći da se inspekciji obratio određeni broj subjekata u čijim objektima se konzumira nargila sa željom da postupi u svemu prema instrukcijama inspekcije



kako bi svoj rad ozakonili. Zbog nedostatka propisa istim nismo mogli pomoći, iako se radi o urednim poslodavcima koji upošljavaju ne mali broj radnika.

Iz svega gore navedenog smatramo da je neophodno donijeti propise koji bi uredili navedenu oblast, kojima bi se između ostalog uredilo i pitanje minimalno-tehničkih uslova za obavljanje navedene djelatnosti kako sa zdravstvenog aspekta tako i sa aspekta sigurnosti jer se prilikom pripreme za konzumiranje nargile koristi otvoreni i ničim zaštićeni žar koji može izazvati požar.

S poštovanjem,



**Dostaviti:**

1. Predsjedateljici Skupštine KS
2. Sekretaru Skupštine KS
3. Sekretaru Vlade KS
4. Arhiva

